

671.31-3  
074  
77

第七册

卷十七

藝文志三  
禮記

卷十八

藝文志四  
書

尉氏縣志卷十七

藝文志三

碑記

琅邪王傅蔡朗碑

蔡邕

君諱朗字仲明蓋倉頡之精允姬稷之末胄也昔叔度文王之昭建侯于蔡以國氏焉迄于平襄周祚微缺王室遂卑齊晉交爭強楚侵陵昭侯徙于州來公族分遷氏家于園奕葉載德常歷宮尹以逮于茲君雅操明允威厲不猛履孝悌之性懷文藝之才包洞典籍刊摘沉秘知機達要通舍神契既討三五之術又采二南之業以魯詩教授生徒雲集莫不自遠並至栖遲不易其志簞食曲肱不改其

樂心棲清虛之域行在玉食之間是以德行儒林智周當  
代四岳稱名帝曰余聞元和元年徵拜博士舒演奧秘贊  
理闕文所立卓爾度躡雲蹤其選士也抑頑錯枉進聖擢  
偉極遺逸於九臯揚明德于側陋拔茅以彙幽滯用躋加  
以清敏廣平好是正直規誨之策日諫于庭忠讜著烈令  
聞流行聖朝以藩國貴胄先帝遺體或以繼絕襲位正於  
阿保未洽雅訓驕盈僭差或蹈憲理非宏直碩儒莫能匡  
弼蔡君審行修德進退可度遷河間中尉琅邪王傳乃從  
經術之方示以棐謀之威率禮莫違其國用靖雖安國之  
輔梁孝仲舒之相江都靡以加焉勲績既盛帝簡其功將  
授上位遷于紫宮賦壽不永邁此疾疢五十八永興六年

夏卒

嗚呼哀哉凡百君子咨痛罔極殷懷傷悼含涕流惻如  
何昊天喪我師則爰勒斯銘式昭其德銘曰天縱明哲  
於赫我君含宏光大元覽孔真潛樂教思韞玉衡門雲  
龍感應養徒三千珠藏外耀鶴鳴聞天若時徵庸登祚  
王臣綜彼前疑定此典文叅佐七德俾相大藩身沒稱  
顯永遺令勲表行揚名垂示後昆



魏散騎常侍步兵校尉阮公碑

嵇康

先生諱籍字嗣宗陳留尉氏人也厥遠祖陶化於上世而先生宏美於後代詩所載阮國則是族之本也先生承命世之美希達節之度得意忘言尋妙於萬物之始窮理盡性研幾於幽明之極和光同塵羣生莫能屬也確乎不可拔當塗莫能貴也或出或處與時升降或默或語與世推移望其形者猶登嶽涉海蕩然無以充其高測其深覽其神者猶旁璞親珪肅然無不欽其寶而偉其奇也不屑夷齊之潔故其清不可尚也不理一作履惠連之污故其道不可屈也遽瑗升降於卷舒甯武去就於愚智顧盼二子不亦泰如危宗廟之犧安不靈之龜故無孤犢之逼而有塗

中之廣觀屈穀鳴鴈是以處不才之間察巨瓠緯帶是以遊有用之際夸大辯而御之以訥資大白而滂之以辱爲無爲而名不能累也事無事而世不能役也紆垂天之翼於寂寞之域投芒刃之穎於有解之會固恢恢必有餘地豈若接輿被髮以養生於陵灌園以求實齷齪近步循軌轍而已哉尼父議老氏於猶龍衛賜警重仞於日月揆之先生其殆庶幾乎方將攀逸駕於洪涯邈遐軌於巢州跨宇實以高挹凌雲霄以優游享年如干遺疾而卒於是遠鑒之士有識之徒先生之歿夫豈不慨然臨濠梁而存惠子之問運斧斲而思郢人之力乃探蹟索隱以敘雅操使將來君子知先生之跡略舉其志系之曰峩峩先生天挺

無欲元虛恬澹混齊榮辱盪滌穢累婆娑山足胎胞造化  
韜蘊光燭鼓棹滄浪彈冠嶠嶽頤神太素簡邁世局澄之  
不清溷之不濁翱翔區外遺物流俗隱處巨室反真歸樸

汪汪淵源邁迹圖錄





重建阮嗣宗廟碑

李

京

唐秘書省正字

自二儀既闢三才肇分選賢之道旣彰旌善之門必著爰有賢公姓阮諱籍字嗣宗晉代陳留尉氏人也性惟高尙道本淳和杯觴淋漓嘯傲風月眼能青白尙賢愚而迥分口善雌黃品人倫而克中竹林樂志蓬池養神振百代之風騷作七賢之領袖雖則幽稱阮巷可以慶大于門小阮則牧守始平大阮則步兵校尉官資有別氣槩攸同流俗不能染其真越禮無所拘其節仙方有術孝道無虧告親亡而博局尙終雖心喪而目先垂血識達希夷之理道包巢許之先情高而鶴立崑峰性靜而松標雲嶺悲興窮路嘯入蘇門放曠天低襟懷地窄一朝榮達四序推移蝶夢

之理難窮蟬蛻之門詎測青鳥啟十白馬來并在縣東南  
隅計數五十里擇其善地以葬賢人焉其墳也勢壓龍頭  
形高馬鬣萬家耆老共建禱祠房廊四十間儀仗左右足  
堂殿峻矗廟貌嚴明威生九月之霜階庭凜凜照並三春  
之日覆育温温爐中爭爇於寶香砌下競傾於竹葉千門  
仰德萬戶霑恩敬之奉之必助其福傲之慢之必降其禍  
變化莫究救護多門白額歸山庶絕牛羊之患黃巾出境  
免懷數斂之憂凡有禱祀悉皆響應固可致瞻依於四遠  
薦牲幣於一方次有都維那李温等堅持敬信至奉神明  
經營不憚於辛勤教化罔辭於寒暑躬親跋涉遠歷關河  
自入名山選其美石冀顯殊功之成就須求哲匠以磨礱

用紀芳馨將傳億載京詞非黃絹學乏絳紗冀承衆請之  
知難免寡聞之誚慙無健筆難述仙才因勒貞珉用彰不  
朽莊敬直書其爲頌曰放曠拔俗徽猷尙傳芳馨百代領  
袖諸賢廊排寶鼎架滿金錢降歆善惡威靈儼然清風應  
響廟貌如新左右儀仗次第品倫杯傾九醞饌列八珍威  
容除害福祐鄉人猗歟達士譽美苕菴晉朝已沒阮巷猶  
存光輝一邑衛護千門無高無下求恩信恩前當石柱後  
倚墳林新碑闐闐古樹森森瑩絕窟獸枝無宿禽千秋萬  
歲薦奠同春



尉氏縣張侯遺愛碑

賈誼

尉氏本春秋鄭大夫尉氏之邑望于時後用爲隸郡治代各不同至宋始屬開封國朝因之中號多良吏迨我張侯蓋亘前後而僅見焉者侯名璉字伯純世爲晉之雙澤人今上龍飛第一科爲宏治己酉侯舉于鄉丙辰舉進士越明年丁巳受命來知縣事維尉氏居河之陽去汴未百里爲西南要衝地汚土瘠租稅煩重侯以難治患比下車告祀人神胥悅尋視學宮傾圯甚非所以禮賢而育才者况士乏科目亦已久矣或者咎于風水侯旣蒞厥事之三月迺謀爲改拓殿廡門宇齋舍庖庫之屬撤敝加新生徒學業別立課程提調作興之方有加政暇親解經懃言要義

其爲文務根理致去凡陋其爲教俾崇孝悌忠信禮義廉  
恥之節各鄉仍立社學延師儒以分教之人由是志學向  
道士習殆變立賞罰法以課農桑其有貧不能耕者量爲  
補助歲嘗稷邑民流徙四方甚衆聞侯之德相與來復者  
歲五百餘家皆檢籍還產安堵如常邑多盜患侯緝知之  
諭以德禮皆股慄更爲善良者七十人倉廩所以保民邑  
甚空虛侯曲爲營置及罪贖糴勸之積得萬餘石足備荒  
歉城塹頽敝者久之侯加築鑿起警樓以峙屏衛壇壝封  
植如式令民守之復其家公館有別補舍有役橋樑道路  
之設有詰他如恤孤存老勸善懲惡行均徭正風化厚里  
俗冠婚有儀喪葬有禮浮屠有禁邑不作佛事自侯始也

湖襄川蜀暨吾徽崇諸藩郡朝貢來者歲無虛日中使民  
尤病之侯以正處竟不爲所擾藩臬臺署公使勾稽之輩  
亦自斂束無敢輒至公室民興禮讓訟聲不聞庭案寂如  
也鄰邑生員嘗匿其師之馬事聞于臺檄下侯按之至燭  
其情有可矜者擬以服制律差本罪一等蠲其刺當道嘉  
其識疑獄平反多類是者嗚乎吏之道循與酷對而貪鄙  
柔懦儉細庸俗什伯千萬之不一者皆吏也維漢興循吏  
爲多後世詩書道廢而刑名之習轉嚴吏其良者幾希肆  
我祖宗聖相承建官圖治守令之選益慎重之邇非進  
士不拜鄉進士之賢者始與下蓋不能也考覈貴名實政  
通教舉咸以能擢未有如我侯之兼最焉者侯讀書見道



通敏博洽自六經以及諸子百氏書罔不究極爲政雖嚴

一以愛人爲主甫初考河南鎮巡疏聞者再謂政教兼舉

以儒飾吏而百廢殆無不興者古以循稱後世以良名侯

其庶幾矣乎生養富壽安逸之賜方于侯焉德之行且去

矣其所以愛吾人者固將不朽盍樹碑邑門而共識之以

文走予因以見尉自有令侯爲首稱并繫之詩俾且歌云

昔在春秋有曰尉氏維鄭大夫厥縣伊始自彼有令亦多

其人我侯戾止寶邁其倫侯政聿修侯教攸舉興我學校

清我罔罔民風熙熙士習雍雍旣富而恬屋將可封侯有

至仁翼覆卵育侯有至明別慝旌淑鄰邑政弊侯能濟之

鄰邑獄成侯能平之厥績載明侯用是陟厥愛載深民用